

Occidentē mouentur omnes, & nullum simpliciter ab occidente in orientem, sed secundum quid, quia nimirum ad signa orientalia mouetur, vt mox declarabitur, Quod vt intelligatur, duo sunt Zodiaci in corporibus cælestibus potissimum concipiendi, Vnus quidem in primo mobili, seu de cimo cælo, qui solus est verus, ac proprius Zodiacus, quem Astronomi intelligunt, quando de Zodiaco absolute loquuntur, constans duodecim partibus equalibus, quæ signa cælestia vocantur, hoc ordine, Aries, Taurus, Gemini, Cancer, Leo, Virgo, Libra, Scorpius, Sagittarius, Capricornus, Aquarius, Pisces: quæ his characteribus ab Astronomis exprimi solent,

Aries	Taurus	Gemini	Cancer	Leo	Virgo
♈	♉	♊	♋	♌	♍
Libra	Scorpius	Sagittarius	Capricornus	Aquarius	Pisces
♎	♏	♐	♑	♒	♓

Hi enim characteres significant eodem ordine prædicta 12 signa. Quare diligenter notandi erunt, memoriæque mandandi, quoniam frequentissimus eorum vsus existit apud Astronomos, sæpissimeque in sequentibus adducuntur. Sunt autem quælibet duo, superius videlicet, & inferius, in cælo per diametrum opposita, quod etiam notandum est; Nam sæpius fiet mentio signorum oppositorum. Alter vero Zodiacus concipiendus est in nona sphaera priori Zodiaco directe suppositus cum eisdem duodecim signis. Primus ille Zodiacus dicitur ab Astronomis immobilis & fixus, non quod non moueatur ad motum sui orbis, in quo est, sed quod eius signa eodem semper modo se habeant ad Aequinoctialem, & Coluros primi mobilis, ita vt semper principium ♈. sit in Aequinoctiali circulo, similiterque principium ♎; vbi nimirum Colurus æquinoctiorum Aequinoctialem intersecat. Rursus principium ♋ reperitur semper in Coluro solstitiorum, similiterque principium ♑; Idemque de reliquis signis, & punctis primarij illius Zodiaci proportione quadam dicendum erit. Secundus autem Zodiacus dicitur mobilis, & non fixus, non ea solum ratione, quod ad motum sui orbis, in quo est, moueatur; hoc etenim commune etiã est primo illi Zodiaco, & tamen immobilis appellatur: sed quod eius signa non semper eodem modo sese habeant ad Aequinoctialem, & Coluros primi mobilis. Non enim prin-